

Phan maix ang sidawng ka
gawhgrawng pa tiem ka daux lai
in:, yuh bwan son chawka ka sara
ceucaw mai: sara cao sidiex lox
bwan gauxrhawm liak.

Kieh Siyiex nawb bwan ka
piang pex kukaux daux pwi .



Siyiex Mawh Mawx?

Lox tawm:

Krax pa bak pa keut ti tiem: lai grawng krax moh Siyiex in, mawh sonsang tawng mai: sonsang yumrhawm pwi ka Siyiex mawh Cao phan cao yuh, mai: Cao taoh kawn: pwi khaing: phimap heue. Kaing pa phan pa yuh, mai: kaing krax taoh, mawh kheu kied ting krax moh Siyiex mai: mawh kheu mawh Nawh Siyiex krax moh krax rhawm tete te lai heue.

Can pwi pa phat ka lai in, khyoxkhaw ex phat khawm rhawm khawm rhi tix mhawm mhawm, mai: tawx bawg yam ti phat kriem kriem kre kre liak. Kheu grawng in mawh pa kied ting ceu ka son kawn: pwi ku kaux, son ju in mai: son ju khaix heue. Grawhgrawng pa tiem: ti deuh ka daux phuk lai iak in, lheu ting ceu khaing: can pa koe ka pieang haktiex khawmuik heue. Kieh can pwi pa phat ka lai in ku kaux daux pwi, pon pa gauxrhawm, nyawm rhawm nyawmrhi jheeng jheeng heue.

Rev. Ngaox Khun Pen



1.Siyiex mawh mawx?

Siyiex mawh Cao pa jah ti koe sivoex paox tix, mai: mawh Cao pa ghoik ti koe khaix paox tix, pa kok mawh Siyiex pa jah mai: pa ghoik, pa koe leeing ju leeing phan heue. Siyiex mawh Cao pa phan pa yuh ka can pa koe kuceu

khawmuik, pa chix yaox mai: pa ang chix yaox kuceu ku cawng heue.

Siyiex mawh pa ting siawp sibrawm, mai: pa grum naog mai. min plakngai pieang khawmuik heue Nawh tawng ka ceu pa koe khawmuik mai: chix yuh kuceu khawmuik, mai: ting sibrawm ka pieang khawmuik heue. Nawh grum naog mai: kraxmoh krax- rhawm mai: mawh Siyiex krax moh heue.

Phuk lai sigang khri Siyiex tiem: ti deuh yuh nin...

"Mai: pex deuh tix tawng, Simiang Siyiex mawh Siyiex awx. Nawh mawh Cao pa phan' pa yuh kah ex, mai: mawh Siyiex ex, mai: ex mawh pwi Nawh, mai: cub yung' pa sax sawm: mai: Nawh heue." (Yaogyaw 100:3)

Siyiex ah nin ka Mose," AUX MAWH AWM PA MAWH AUX" (Lih Hu:- 3:14)

2.Siyiex koe dee mawx?

Siyiex koe ka pieang meung raoma mai: ka pieang haktiex kudah kudee heue. Kheu Siyiex mawh khwan:, kawn: pwi ang chix yaox ka Nawh heue. Vieang mawh kawx nan, Nawh yaox ka kawn: pwi mai: ka can kuceu khawmuik heue. Siyiex tawng can ceu pa keut kawn: pwi daux rhawm rhi tix khawmuik mai: Nawh tawng

ka pa hoik lih ti mawh mai: pa mawh yam in, mai: pa sang li mawh khaix in, khawmuik heue.

Siyiex chix tawng ka ceu pa caox mai: pa mhawm, pa rah see mai: pa ang rah see, pa yuh kawn: pwi khawmuik heue. Siyiex tawng ka kuceu khawmuik mai: ot ka daux kuceu khawmuik, mai: koe kudah ku dee, ka daux bawg yam tix taix neh khaing: heue.

Phuk lai sigang khri Siyiex hoik tiem: ti deuh yuh nin,

"Aux tak sang hu: dee mawx son sang luan khaing: khwan: Maix? Tak sang to dee mawx son sang luan khaing: pakngai Maix? Phan aux haok daux raoma kawx, Maix hoik ot tan: Phan aux tawm ti it ka daux meung yum kawx, Maix hoik ot tan: heue." (Yaogyaw 139:7-8)

3.Chix pon tawng Siyiex koe yuh ka mawx?

Grawhgrawng pa koe Siyiex, ex chix pon ti tawng khu ceu in khankix awm pa hoik tiem: ti deuh plak greem tin: heue.

(i) Pon ti tawng Siyiex koe khu phuk lai sigang khri

Phuk lai sigang khri pa koe yam in, mawh phuk lai pa tiem: ti deuh grawhgrawng Siyiex heue. Can pwi pa tiem: ka phuk lai an: khawmuik, koe tix pon kaux heue. Kix tang:

dee ot khaing: paox tix, kheu khwan: Siyiex lih hoek ka pieang kix, mai: kieh kix chix tawng ka grawhgrawng pa raux pa mox pa yuh Siyiex heue. Kix tang: tiem: kaux mawx kaux an: awm pa gau khwan: Siyiex ka kix heue. Khaix hoik khrawm ti kleuk tau, ka lai pa hoik tiem: pwi tix pon kaux an:, mai: tom kieh lih mawh phuk lai pa jiet mhawm, mai:, phuk lai tang: ceu ang chix awm phuk lai sigang khri singax cie Siyiex heue.

Ka daux phuk lai sigang khri singax an:, hoik tiem: ti deuh grawhgrawng Siyiex grum naog heue. Mawh kheu phuk lai sigang khri singax an:, kawn: pwi pon ti tawng grawng koe Siyiex tete te lai heue.

(ii) Pon ti tawng Siyiex koe kheu lox pa krai Yesux

Num pa hoik luan 2000 num pai dix, Yesux Khrit kawn: Siyiex, teei nex nham kawn: pwi, lih hoek ka pieang haktiex in heue. Yesux Khrit hoek ti kham sakse grawhgrawng keeing Tix, pa koe tix kaux khaing:, mai: krai grawhgrawng pa ploi Siyiex Nawh lih hoek ka pieang haktiex in heu. Yesux kieh kawn: pwi, tawng ka grawhgrawng Siyiex, mai: grawhgrawng pa koe alo Siyiex yuh ka mawx heue.

(iii) Pon ti tawng Siyiex koe khe can ceu pa hoik phan hoik yuh Nawh kuceu

Can ceu pa hoik phan hoik yuh Siyiex ti deuh kuceu kucawng, pa mawh haktiex raoma, rawm sigrit sigra, khix, singaix, simuing mai: can pa koe pa mawh gawng lua, klawng ngawd, khaox ox rib niem, mai: tosat tomiang: kuceu khawmuik an:, mawh pa lih koe kheu pa phan pa yuh Siyiex heue. Pa ang Siyiex phan, mai: nieb lih koe, ang koe tix ceu kawx heue. Phan jhak ti yaox, mai: keut ti tawng ka can ceu pa phan pa yuh Siyiex ti deuh an:, ex pon tawng koe pa dao pa am: tom: nie ceu heue. Kawn: pwi pa koe pingnya cuyi khankix, ang chix uik keut uik tawng, ka grawhgrawng ceu pa phan pa yuh Siyiex heue. Phan jhak ti yaox ka grawng an:, pon ti tawng grawng pa koe Siyiex tete te lai, kheu can ceu pa hoik phan hoik yuh Nawh khankix heue.

Phuk lai sigang khri Siyiex hoik tiem: ti deuh yuh nin,

“Yam jah, Siyiex phan haktiex mai: raoma heue” (Yam Jah 1:1)

(iv) Pon ti tawng Siyiex koe kheu siawp sibrawm pa giex pa kwang Nawh ka kuceu

(1) Singaix, khix, mai: simuing

Phan jhak ti yaox ka singaix, khix, mai: simuing khankix, kix koe bawg yam toh, mai: koe bawg yam klip heue. Siyiex Cao pa phan pa yuh ceu an: khankix, giex kwang kix ka siawp sibrawm Tix, mai: kix chix toh chix klip bawg yam pa cox khre Siyiex ti deuh son kix, bawg mawx bawg an: heue. Phan Siyiex ang giex ang kwang kix ka siawp sibrawm Tix, kix tee lih koe pa ludlied pa khlukkhlaik, pa ang khaw ang caw paox tix ku singaix heue. Vieang mawh kawx nan, kheu koe Cao pa giex kwang kix ka siawp sibrawm Tix, kix ang ludlied khlukkhlaik, mai: caw bawg yam tix bawg mawx bawg an:, ku singaix ku sawm heue. Grawhgrawng nawh, ex tawng grawng pa koe Siyiex Cao pa giex kwang ti deuh kuceu, ka siawp sibrawm Tix tete te lai heue.

(2) Rawm sigrit sigra, mai: rawm klawng khankix

Phan jhak ti yaox ka rawm sigrit sigra, mai: ka rawm klawng khankix, ex yaox kix hu: ku bawg ku yam ku ngaix ku sawm heue. Kix ang

laux ang lee tix bawg kawx, ca hu: ang jud ang jai heue. Rawm khankix ang koe dee teuk dee die, mai: kix ang chix naog chix kreh ka pieang haktiex in heue. Phan krai tete, rawm sigrit sigra kawn: nie lheu vieh, lheu ting khaing: haktiex in heue. Vieang mawh nan, ang chix kheem: ka haktiex, kheu koe cao pa giex pa kwang ka kix ka siawp sibrawm pa ting pa lhaong heue. Mawh kheu nan, ex tom tawng pa koe Siyiex kheu pa hoik giex kwang Nawh ti deuh kuceu ka siawp sibrawm Tix heue.

(3) Bhaung (keu:)

Kawn: pwi mai: tosat tomiang:, mai: can khaox ox rib riem pa koe kuceu khawmuik, im ju kheu pa pon bhaung heue. Phan ang pon bhaung, mai: phan ang toek bhawm, ang chix im ju: tix bawg kawx heue. Kawn: pwi toek bhawm tix ku bawg ku yam, mai: im ju: kheu pa toek bhawm tix heue. Vieang mawh kawx nan, bhaung lih hoek khaing: dee mawx? Mai: ot dee mawx? Mai: sang hu: dee mawx? Kawn: pwi ang dak uik tawng ka heue. Kheu mawh Siyiex Cao pa phan pa yuh, pa giex pa kwang ti deuh ka siawp sibrawm Nawh, tom chix lih mawh pa koe bwanson son kuceu, pa ang kawn: pwi chix tawng tom uik ka grawng an: heue.

Phuk lai sigang khri Siyiex hoik tiem: ti deuh yuh nin,

“ Simiang Siyiex ceep kraung pa koe min plakngai mai: ot ka daux nyiex haw Tix heue. Mai: Simiang Siyiex hoik ceep kraung pa yuh nan, mai: nhawt maox rawd nyoï pa ting riang ting rao mai: kieh haktiex kaux cong tom sidah mai: ang kieh vutvied yung yiang:heue.” (Yacgyaw 93:1)

4. Ka daux pa phan pa yuh khawmuik mawh pa tix pa nie lheu ting ceu khaing: paox tix?

Yam yuh Siyiex haktiex mai: raoma, mai: can pa koe kuceu kucawng, Nawh cao phan yuh ka daux liah singaix heue. Nawh cao phan kuceu ka siawp sibrawm Tix heue. Yam Siyiex ah, kieh lih mawh heue, mai: lih ti mawh awm pa ahie Siyiex tix ceu hoik tix ceu heue. Siyiex hoik phan kuceu khawmuik jah daux singaix tix, tom: sidah daux singaix liah heue. Ka daux singaix liah, Siyiex phan ka kawn: pwi heue. Yam phan yam yuh Nawh ka kawn: pwi, Nawh ang lai ah kieh lih mawh heue.

Nawh teei phawng tiex, mai: miien yuh awm riang pakpeung tokaux Tix, mai: phlu: bhawm pa im ju ka daux meeh nawh, mai: kawn: pwi lih

mawh pa im ju heue. Pa Siyiex jah ti phan yuh sivoë paox tix, mawh kawn: pwi simex pa kok ceu kaux nawh mawh Adam heue. Adam ot nong nong, kheu nawh ang koe paoxpie, Siyiex kieh nawh laig it, mai: teei siang praok nawh tix gawng, mai: baox phan yuh ka kawn: pwi sibon: tix kaux, pa kok mawh Evax, sonsang mawh pa teem pa coi ka Adam heue.

Khaix hoik phan hoik yuh Siyiex ka can ceu pa koe kuceu khawmuik jah singaix tix tom sidah singaix phwan, Nawh tom phan ka kawn: pwi ka daux singaix liah heue. Grawhgrawng nawh kheu Siyiex moh kawn: pwi, nawh phan pa lo kawn: pwi sivoë sonsang grum naog pa lo kawn: pwi khawmuik heue. Khaix hoik phan hoik yuh Nawh kuceu ka daux liah singaix, yam hoek singaix aliah, Siyiex laux lee Tix mai: nawb bwan ka kawn: pwi mai: can ceu pa phan pa yuh Nawh khawmuik heue. Mawh kheu nan, ex tawng grawng pa Siyiex nie lheu moh ka kawn: pwi khaing: ceu pa phan pa yuh Nawh khawmuik heue.

Phuk lai sigang khri Siyiex hoik tiem: ti deuh yuh nin,

“ Khaix an, Siyiex ah nin, kieh ex yuh kawn: pwi awm riang pakpeung Cao ex, mai: kieh

kix kwang ka pieang kax pa koe dauw rawm
sigrit sigra mai: ka pieang sim raoma mai:
ka pieang khawng brie khawmuik, mai:
kwang ka haktiex mai: khawm pa chix mo
pa koe pieang haktiex khankix heue".
(Yam Jah 1: 26).

5. Phan Siyiex moh ka kawn: pwi, kawn: pwi lih mawh pa yum khuu pa tix?

Khaix hoik phan hoik yuh Siyiex ka kawn:
pwi pa mawh Adam mai: Evax, deuh kiex ot
dauw sipeem jiet mhawm pa kok mawh Eden
heue. Ka dauw sipeem an:, Siyiex phan ti deu
plix khaox kuceu heue. Ka dauw greung sipeem,
Siyiex phan ti deuh plix khaox pa im ju pa kieh
chix gawieh ti tawng pa mhawm mai: pa ang
mhawm heue. Siyiex tawm: lox ka Adam mai:
Evax ah nin, pax chix ti ih plix khaox ka koe ka
dauw sipeem in kuceu heue. Vieang mawh kawx
nan, pax paw vi ih plix khaox pa koe greung
sipeem heue. Phan pax ih yam mawx, pax tak
yum yam an: tete heue. Khaix Siyiex hoik tawm:
lox ka kiex, phicaox laig ka dauw siuing hoek ti
nyaw glaw, kiex ih plix khaox pa ang Siyiex cu
kiex ih an:, kiex cu: lox phicaox, mai: teei ti ih
plix khaox an: heue. Awm pa hoik tawm: Siyiex

lox ka kiex, khuu kiex leh ka lox tawm: jhawm:
krai Siyiex, kiex lih ti mawh kawn: phimap mai:
hoek ka dauw krax yum heue. Jah yam an, krax
kharhawm kharhi kuceu, mai: krax lauxrhawm
lauxrhi kuceu, mai: krax saux krax yum kuceu,
hoek ka pieang kawn: pwi pieang ca haktiex in:
khawmuik khawm leeing heue. Vieang Siyiex
moh ka kawn: pwi, mai: nawb bwan son ka
pieang kawn: pwi kawx, khuu kawn: pwi ang
lai cu lai nghiet ka lox Siyiex, tom yaax ti hoek
ka dauw phimap mai: krax som: ju, ju in mai: ju
khaix leeing ju leeing phan heue.

Phuk lai sigang khri Siyiex hoik tiem: ti deuh
yuh nin,

**"Grawhgrawng nawh ngawh riang phimap
phighram mawh krax yum, vieang mawh
kawx nan, khawngphak bwanson pa tawx
Siyiex mawh ju leeing ju leeing phan ka
dauw simiang ex Yesux Khrit heue".**

(Romax 6:23)

6. Phimap mawh pa tix?

Phimap mawh pa leh lieang thiang lox
tawm: jhawm: krai Siyiex mai: yuh alo to kaux
tix, cu nghiet ka lox phicaox heue. Phimap mawh
rawng ting, pa tan: pa thox sinax Siyiex mai:
kawn: phimap, ang kieh yaax paax tix heue. Can
pa ang yumrhawm ka Siyiex, mai: pa hawt yuh

ka alo nex nham khawmuik, mawh phimap heue.

Siyiex sidaing koeng ka phimap mai: ang rawm jhak ka phimap cecix kawx heue. Vieang mawh kawx nan, Nawh cao moh ka kawn: pwi, kheu kawn: pwi mawh khaix taix Siyiex, mai: mawh kawn: Nawh heue. Khaix hoik lud hu: kawn: pwi ka dauw phimap, mai: lih ti mawh pa yum, kawn: pwi hoik singai hu: khaing: Siyiex heue. Kheu Siyiex ang khaw caw mai: phimap, mai: pwi pa yuh phimap khankix ang chix dex dawd mai: Siyiex heue. Vieang mawh kawx nan, Siyiex ca kawn: moh ka kawn: pwi, pa ot ka dauw phimap phighram heue.

Phuk lai sigang khri Siyiex hoik tiem: ti deuh yuh nin,

"Vieang mawh nan', krax pa phit pa lud pex khankix hoik kieh pex gwieh tix khaing:' Siyiex pex, mai: phimap phighram' pex hoik kieh Nawh mox pakngai' Tix khaing:' pex, sonsang ang Nawh lai mhong' heue".

(Isayax 59:2)

7. Kawn: pwi sang pon lawd luan khaing: phimap mai: krax yum kheu riang rao tix lie?

Khaix hoik laig phimap ka dauw kawn: pwi, kawn: pwi lih ti mawh pa yum mai: pa som ju ka dauw krax prawng krax ciyang leeing ju leeing

phan heue. In hoik mawh awm pa tawm: Siyiex ti deuh ka kawn: pwi ka dauw sipeem Eden heue. Siyiex ang chix pie chix lhen awm kawn: pwi heue. Yarn hoik laux hoik som kawn: pwi sivoeng ngai Siyiex, mai: sang hoek ka krax prawng krax ciyang leeing ju leeing phan, kawn: pwi ang lai koe ceu pa keut pot jun pot tix ceu kawx heue. Vieang coca sonsang luan khaing: phimap mai: krax yum kawx, ceu pa chix taoh kawn: pwi khaing: phimap an:, ang koe tix ceu kawx heue. Rieng rao kawn: pwi ang chix kieh kawn: pwi lawd luan khaing: phimap mai: krax yum heue. Mawh kheu kawn: pwi khawmuik hoik lud dauw krax Siyiex, tak sang yaox ti kham: geu krax kharhawm kharhi pa ang chix yum, pa mawh dauw lah ngu: dee greeik rhang dauw meung mawnarhok heue. Siyiex jhak ka kawn: pwi mai: kied koe krax caoxrhawm caoxrhi ka kawn: pwi heue. Phan Siyiex ang cox khre dauw krax dauw blawng, kawn: pwi ang lai koe dauw krax pa sang lawd luan khaing: phimap krax yum heue. Ceu pa yuh kawn: pwi pa mhawm mai: pa coca kawn: pwi ka rieng rao tokaux tix, hoik mawh pa giex pa going sivoeng ngai Siyiex heue.

Phuk lai sigang khri Siyiex hoik tiem: ti deuh yuh nin,

**“ Ka daux kawn: Nawh an, ex hoek krax
taoh mai: krax pluot ploi phimap phighram”.
(Kawlawsie 1:14)**

**8.Sonsang pon lawd luan
khaing: phimap mai: krax yum,
caw ti yuh ka mawx lie?**

Kawn: pwi ang koe siawp sibrawm ti yuh tixtid sonsang kieh tokaux tix lawd luan khaing: phimap mai: mawnarhok heue. Vieang coca ti yuh pa mhawm miex ding kawx, mawh pa ang chix koe bwanson, sonsang lawd luan khaing: phimap heue. Grawh grawng nawh, pa seeing pa brai pa yuh kawn: pwi, nie lheu ting khaing: ceu pa mhawm pa yuh kix heue. Phan krai lox tiag ka grawng an:, hoik awm pwi tix kaux pa teei hak poh, mai: tawb ka tokaux krak yum, sonsang kieh nawh glip heue. Hak poh ang doh chix kieh krak yum an: glip pie tix bawg kawx heue. Awm an:, krax mhawm pa yuh kawn: pwi, mai: riang rao kawn: pwi, ang doh chix kieh ceu pa caox pa caig mai: krax lud krax loe kawn: pwi glip grai sivoengai Siyiex tix bawg kawx heue. Ang doh pon luan khaing: phimap kheu pa coca tix yuh pa mhawm ka riang rao tokaux tix heue. Siyiex hoik tawng grawng an: mai: caoxrhawm ka kawn: pwi phimap khankix heue. Phan Siyiex ang taoh ka kawn: pwi, kix

tak sang yaox ti hoek krax laux krax leeing mai: yaox ti kham: geu krax prawng krax ciyang leeing ju leeing phan heue. Mawh kheu nan, Siyiex ploi kawn: pa moh tix pa koe tix kaux khaing:, pa mawh Yesux cao taoh hoek ti teei nex nham kawn: pwi mai: lih keh khaing: bon: kreh pa singax pa mawh **Marix** heue. Khaix an:, Siyiex laug ti teei Yosiep kieh priex ka Marix mai: kieh kiex mawh miex moeng heue. Kheu Siyiex khaw caw rhawm ka Yosiep mai: Marix sonsang mawh kiex nyiex ma pa priex ka kawn: Siyiex, pa sang mawh Cao pa taoh kawn: pwi khaing: daux phimap heue.

Yam hoik ting lhaong Yesux nawh grum naog mai: pingnya mai: grum naog mai: siawp sibrawm pa tawx Siyiex heue. Yesux yuh kaing pa cau Siyiex nawh yuh khawmuik mai: im ju: ka daux alo keeing Cao heue. Nawh sidiex ka grawhgrawng meung Siyiex mai: krai pwi mhong grawhgrawng meung raoma heue. Yesux cox pwi pa koe jhawm: saux jhawm: ngia kuceu kieh moi heue. Pwi saux laung:, pwi saux sipawg, pwi dud ngai, pwi lheur, pwi yhok, bon: jah nham kaonum ra:, pwi pa kham: jhawm: saux tingoe sidaix num, pwi aw: ang chix sikah, pwi laig phicaox mai: pwi koe jhawm: saux kuceu hoek ka Yesux mai: Nawh cao kieh jhawm: saux kix moi khawmuik heue. Lheu khaing: an:, pwi pa

hoik yum, khankix kawx Yesux deeh kieh kix im: heue. Kaing pa daox pa am: pa yuh Yesux kuceu hoik ao tom: sidah ka pieang haktiex kudah kudee heue. Kawn: pwi pieang haktiex khawmuik khawm leeing, ang chix yuh kaing pa yuh Yesux pie tix bawg kawx, pie tix kaux kawx heue. Kheu Nawh mawh kawn: Siyiex pa lih hoek khaing: keeing Cao raoma heue. Ka daux bawg yam an:, cao giex kaing lih pa ting khankix mai: simiang giex kaing haktiex khankix, bo rhawm ka Yesux, mai: kied koeng ka Nawh kheu kaing pa yuh Nawh pa daox pa am: heue. Pwi haoh pwi hun: hawt hu: tau mai: Yesux ku bawg ku yam heue. Mawh kheu nan, kix tom koeng ka Yesux mai: giex ka Nawh mai: tawk Yesux yum pieang khaoxlhak heue.

Khaix hoik tawk ka Yesux pieang khaox lhak, kix teei tokaux yum Yesux sipaung ka daux simeeig rang heue. Khaix an:, kix kieh kruh naing pau ka simeeig Nawh heue. Grawhgrawng nawh, sivoe ang Yesux nyang kham: geu pieang khaox lhak, Yesux hoik dha ti krai grawhgrawng pa sang yum Tix, mai: pa deeh kao im Nawh khaing: krax yum heue. Awm pa hoik dha Yesux ti krai ka pwi yuh nan, yam sidah loe singaix Yesux deeh kaoh khaing: simeeig mai: kaoh im: khaing: krax yum heue. Pwi khawmuik kied daox deng ka grawng: an:, kheu pwi yum ang

sax deeh kaoh im: pie tix bawg kawx heue. Khaix hoik kaoh im: Yesux khaing: krax yum, Nawh jhi pwi yaox ka tokaux tix, tix pon singaix tix pon sawm heue. Yesux baox deeh yuh kaing pa hoik sax yuh Nawh awm glang ka singaix pa hoik luan heue. Yesux sidiex gau ka kawn: pwi ah nin, Aux mav/h kawn: Siyiex pa ploi Siyiex hoek sonsang kham: sakse grawng krax moh Nawh mai: sonsang krai kawn: pwi mhong grawhgrawng meung Siyiex heue. Aux hoik kham: yum tang: phimap kawn: pwi pieang khaoxlhak, vieang mawh kawx nan, Aux hoik pex krax yum mai: hoik deeh kaoh im: yam in: heue. Pex khawmuik khawmleeing hoik yaox aux kham geu pieang khaoxlhak mai. hoik yaox pa sipaung ka Aux ka daux simeeig rang:, mai: hoik kieh kruh naing pau ka simeeig Aux ang mawh lie? Vieang mawh kawx nan, awm pa hoik krai Aux ti deuh ka pex Aux hoik pex krax yum mai: hoik deeh kaoh im: yam in heue. Awm an:, pwi mawx ang ah, pa yumrhawm grawng: mawh Aux kawn: Siyiex mai: grawng pa kham: Aux ti yum pieang khaox lhak tang: phimap tix, vieang nawh yum kawx, tak sang deeh kaoh im: ka daux singaix sidah sax heue. Can pwi pa rieb ti teei ka Aux mai: pa yumrhawm ka Aux daux rhawm daux rhi tix tete te lai, tak ang lai hoek

krax laux krax leeing, pon ju leeing ju leeing phan heue.

Nham Yesux pa lih khaiing: pieang khaox-lhak sigrhah ti tik phimap kawn: pwi can pa yumrhawm ka **nawh** khawmuik heue. Vieang ting phimap phighram miex ding kawx, nham Yesux tak sang kieh singax singeh khawmuik heue. Pa ting ceu, mawh pa yumrhawm ka kaing pa yuh Nawh mai: pa rieb ti teei Nawh ka dauw rhawm tix, grawng pa mawh Nawh kawn: Siyiex mai: Cao taoh heue.

Phuk lai sigang khri Siyiex hoik tiem: ti deuh yuh nin,

“ Yesux baow ah nin ka nawh, Aux mawh ceu pa deeh kaoh im: mai: pa im ju heue. Pwi pa yum rhawm ka Aux vieang nawh hoik yum kawx, tak sang im: heue.”

(Yohan 11:25)

9.Meung raoma mai: mawnarhok pa ah nan,sang ah ka pa yuh ka mawx?

Son can kawn: pwi haktiex khawm: mu khawm miang:, koe krax ra nyaing khaiing:, mai: koe dee ot ra dah khaiing: heue. Dee ot tix dah kok mawh meung raoma, phan ang mawh nan meung Siyiex, mai: dee ot ra dah tix dah kok mawh meung mawnarhok heue.

Meung raoma mawh pa cox khre ti deuh son can pwi pa tawng ka tokaux tix mawh pa hoik lud ka Siyiex mai: mawh pa seeing pa brai ka dauw phimap mai: pa tawng tokaux tix ang chix luan khaiing: phimap khu riang rao tix mai: pa yumrhawm ka Yesux mawh kawn: Siyiex pa pon taoh khaiing: phimap mai: pa tawx ju: pa im: leeing ju: leeing phan heue. Meung raoma mawh son can pwi pa yuh nan heue.

Pwi mawx ang ah pa sawn tokaux tix ang koe phimap, mai: een: rhawm ka riang rao tokaux tix mai: ang yumrhawm ka Yesux mawh cao taoh tix khaiing: dauw phimap, tak sang hoek ka dauw mawnarhok heue. Meung mawnarhok mawh **nhawng ngu** pa ang chix yeed pa lah pa gleeing leeing ju: leeing phan heue. Dee simie ti yum: pa ang chix yum:, mai: dee simie tix lawd luan pa ang chix lawd luan, pa mawh dee kharhawm kharhi mai: dee greek nhang tix heue.

Meung raoma mawh dee ot Siyiex mai: ang koe pa khirhawm kharhi, ang koe pa lhat pa graung mai: pa kaig pa twa:, ang koe pa hot sibhawm, mai: pa saux pa yum: mawh dee gauxrhawm tau mai: kawn: cau Siyiex ang jud ang jai heue. Mawh dee grum naog siawp sibrawm Siyiex mai: pa riang min plakngai Nawh Cao jheeng jheeng heue. Meung

mawnarhok ang lai mawh nan, mawh dee cox
Siyiex son **satan**: mai: son can pwi pa leh lox
tawm jhawm: krai Nawh cao mai: pa yuh alo
phicaox satan: heue. Siyiex kied moh ka kawn:
pwi khawmuik khawm leeing, mai: ang rhawm
kieh pwi tix kaux kawx hoek ka daux meung
mawnarhok. Simie kawn: pwi lawd luan khaing:
phimap mai: ot tau mai: Nawh cao ka daux
meung raoma heue.

Phuk lai sigang khri Siyiex hoik tiem:
ti deuh yuh nin,

**“ Dee ang kawng chix yum, mai: dee ang
ngu chix yeet mai: phan caong maix kieh
maix sideeing caong tix, kid ti tik heue.
Laux caong maix mai: laig ka daux pa im
ju, mhawm khaing: koe caong ra khawn:
mai: taing sau ka daux mawnarhok ka daux
ngu pa ang chix yeet heue”.**

(Makux 9: 44-45)

10. Caw ti yumrhawm ka Yesux yuh ka mawx?

Yesux mawh kawn: Siyiex pa koe
tix kaux khaing: heue. Kheu Siyiex moh haktiex
sigrien sigre Nawh tom ploi kawn: tix pa koe tix
kaux khaing: hoek ka pieang haktiex in heue.
Mawh kheu phimap, kawn: pwi khawmuik tak
sang hoek krax laux krax leeing heue. Son ang

kawn: pwi sang hoek krax laux krax leeing,
Yesux kham ti yum pieang khaoxlhak mai: tawx
ngawh phimap kawn: pwi ka nham Tix
heue. Khaix hoik kham Nawh cao ti yum, loe
singaix Nawh deeh kaoh im: sonsang kieh can
pwi pa yumrhawm khawmuik deeh kaoh im:
khaing: krax yum heue. Phan hoik tawng grawng
mawh Yesux kawn: Siyiex, mai: pa kham geu
Nawh pieang khaoxlhak son phimap tix, caw ti
rieb teei ka Nawh daux rhawmrhi tix heue.
Lheu khaing: an:, caw ti een: rhawm ka Nawh,
mai: krub ka Nawh tix kaux khaing: heue. Kieh
Yesux mawh pa ting pa lhaong khaing: kuceu
khawmuik ka daux krax im ju maix heue. Ap
pong tokaux khwan: ju khawmuik ka Siyiex, mai:
ot ka daux Nawh heue. Caw ti mawh pwi pa
hoik tawx yum alo nex nham tau mai: Yesux
heue. Pa im: ju ex khawmuik hoik mawh son
Yesux, mai: tau mai: Yesux, mai: ka daux Yesux
heue.

Pwi pa hoik yumrhawm ka Yesux
khawmuik ang lai baox mawh kawn: phimap
mai: ang lai gauxrhawm ka daux phimap
heue. Kheu Yesux hoik lieag ti teei nawh khaing:
daux phimap ka nham Tix heue. Nawh ang lai
yuh pa khaw mai: alo tokaux tix, yuh pa khaw
pa caw ka rhawmrhi Siyiex heue. Nawh ang lai
een: lai sawn tokaux tix mawh pa ot greem alo

phicaox, mai: sawn tokaux tix mawh pa rah pa see khu nham Yesux heue. Vieang kawm: ot pieang haktiex kawx, yumrhawm ka grawng pa hoik mhai tix deuh ceukaux tix ka daux carang meung raoma heue. Tawng tokaux tix mawh kawm: meung raoma, mai: kieh pakpeung kawm: Siyiex mai: pakpeung meung raoma, sidawng kadaux pa im: ju tix heue.

Phuk lai sigang khri Siyiex hoik tiem: ti deuh yuh nin,

“ Mawh khu Siyiex kied moh haktiex sigran sigre, Nawh tom tawx kawm: Tix pa koe tix kaux khaing:, yuh ka mawx son can pwi pa yumrhawm ka Nawh khankix, tak ang lai hoek krax laux krax leeing, pon ju leeing ju leeing phan heue.”

(Yohan 3:16)

11. Khaix hoik rieb ti teei Yesux mawh Cao taoh tix, mai: hoik yumrhawm ka Nawh cao,ex sang baox caw ti yuh ka mawx?

Yam jah sivoie paux tix caw ti rawg bwan ka Siyiex khawm rhawm khawm rhi tix tete te lai heue. Yam rawg maix bwan rawg yuh nin awx.. Yesux kawm: Siyiex Cao taoh eue,—ting bwanson khu Maix hoik pluat ploi phimap phigrham aux khawmuik heue. Kieh krax

yumrhawm aux, kaux cong ka daux Maix Cao lieak. Kieh aux im: ju: ka daux krax moh Maix, mai: ka son Maix Cao lieak. Aux rawg khawmuik ka daux ceukaux Yesux tix kaux khaing: heue.

Bawg yam mawx ang ah, koe akhwang tix rawg bwan mai: kok Yesux hoek ka daux rhawmrhi tix jheeing jheeing heue. Mawh khu hoik kham: maix ti rieb teei ka Yesux Khrit mawh Cao taoh tix, mai: hoik yumrhawm ka Nawh, maix caw ti kham mhai sakse sivoie ngai Siyiex mai: sivoie ngai kawm: pwi heue. Khaix hoik yumrhawm maix ka Yesux mawh Cao taoh tix, maix caw ti com ka daux ceukaux Keeing Cao, Kawm: Cao mai: Khwan: singax singeh Cao Siyiex loe kaux Tix kaux heue. Ceu pa com rawm mawh pa kham sakse grawng mawh tix kawm: Siyiex, mai: grawng pa ang lai chix tieh chix feen khaing: krax moh Siyiex tix bawg kawx heue. Khaix hoik com rawm, maix tak ang lai ot ka daux alo phimap, mai: gauxrhawm ti yuh alo Siyiex ku bawg ku yam heue. Ang lai baox mawh pwi prim ka daux phimap, mawh pwi khraox ka daux Yesux Khrit heue. Ang lai im: son tokaux tix nong nong. Im: ju son Siyiex mai: son pwi tang: kaux khankix heue. Caw ti kham: mhai sakse grawng mawh Yesux Cao taoh tix, mai: grawng pa moh Siyiex ka kawm: pwi haktiex

khawmuik heue. Hoek dee mawx, ot dee mawx ang ah, caw ti krai pwi mhong grawng krax moh Siyiex mai: krax taoh Yesux Khrit heue. Mawh kheu maix hoik lih mawh pwi khraox ka daux Yesux Khrit tix kaux, caw ti via singai khaing: pa caox pa caig, mai: alo nex nham pa ang rah ang see heue. Kheu maix hoik tawng Siyiex ot dex ngawm dia: tau mai: tix, yungyi lhat graung ka Nawh cao mai: coca yuh ceu pa mhawm ka daux krax im ju: tix ku jheeng jheeng heue.

Phan pon bawg yam, yam mawx ang ah, caw ti rawg bwan ka Siyiex mai: phat phuk lai sigang khri Siyiex heue. Caw ti sawg ot tau mai: pwi yumrhawm mai: yuh pæoxpie tau heue. Phan koe nyiex bwan caw ti hu: dee rawg bwan tau, mai: pwi yumrhawm khankix heue. Yam pon maix akhwang ti yuh ceu pa mhawm pa mhiem, coca ti yuh ceu pa mhawm ka pwi khawmuik heue. Kheu can kawn: Siyiex ku kaux ang lai im: ju son alo nex nham, coca ti yuh pa khaw pa mhawm sivoe ngaix Siyiex heue. Ap pongtokaux rhawmrhi khwan: ju: ka Siyiex ku bawg ku yam heue. Kheu maix hoik ot ka daux tawm taix Siyiex pa ting sibrawm, phicaox pa seeing pa brai mai: pa ang mhawm ang miem ang lai chix pex ka maix tix bawg kawx heue. Camaox caox khaox cien, kaing ang khaw blawng ang jiet, pa koeng riang ciang kloi, pa hu: faik laig sawm,

ang lai chix pex ka maix tix bawg kawx heue. Pwi pa ot ka daux tawm taix Siyiex pa ting sibrawm, Siyiex kia: ngiien ka nawh jheeng jheeng, ang kieh koe pa lhat pa khi: tix ceu kawx heue.

Yuh tom yaox ka Siyiex Cao phan Cao yuh, pa mawh Siyiex krax moh krax rhawm, mai: yumrhawm ka Nawh khawm rhawm khawmrhi tix heue. Kheu ju kawn: pwi mawh pa im: ti vud khaing: ka pieang haktiex in: heue. Sawg ti pon ju leeing ju: leeing phan pa hoik cox ti deuh son pwi khawmuik ka daux meung raoma heue. Siyiex tawx krax im ju: ka maix yam in sonsang nied maix ti doh keut ka phimap tix mai: nied ti hoek ka Nawh cao heue. Siyiex hoik keut pot jun pot ka kawn: pwi khawmuik sonsang hoek ka Nawh cao phai phai, kheu Nawh ang rhawm kieh pwi tix kaux kawx hoek krax som ju:, mai: simie pwi khawmuik ot mai: Nawh ka daux meung raoma heue. Phuk lai sigang khri Siyiex hoik tiem: ti deuh yuh nin,

“ Mai: kieh pa nhim Cao Khrit giex kaing: ka daux rhawmrhi pex, pa hoik kok pex kah, khawm: ka tokaux tix mu: khaing:: mai: kieh pex yaogyaw bwanson heue. Kieh

gumlox Cao Khrit ot ka daux rhawmrhi pex
tom nie, mai: sidiex gau ka paux tix, ka daux
krax pingnya cuyi khawmuik, ka lox rhax
yaogyaw, mai: lox rhax lai, mai: lox rhax
bwan, kieh koe krax yaogyaw bwanson: ka
daux rhawmrhi pex mai: ah lox rhax ka
Siyiex heue. Mai: pex yuh pa tix ang ah,
ka daux gumlox ang ah, ka daux pa yuh ang
ah, yuh khawmuik ka daux ceukaux
Simiang Yesux mai: yaogyaw bwanson ka
Siyiex pa mawh Keeing Cao ka daux Nawh
heue". (Kawlawsie 3:15-17)
